

始行啓門。游人皆詫異之。

一阿樂爾巴士伯之來歷及其行爲。阿樂爾美國人。中國海關人員。巴士伯法人。在海

關當差有年。前年安南賽會。經彼辦理。此次又派充書記。巴自中國來時。攜帶華人十名

到美。一人因病不能到岸。其外九人在會場供役。與巴同居。華人住地下一層。即地窟黑

之級不佐米糧由巴發給。九人輪流值炊。巴住華多年。染中國宦習極深。出門均要華人啟

門躬立。每日會場洒掃。皆是此九人供役。阿本散魯伊斯省人。今一旦膺中國副監督之

職。其炫耀自不待言。每當會場交接。必痛痛快快。以中國如何昏闇。商人如何頑固爲言。

并云。若無我外人代辦賽品。中國全體。實不知賽會爲何事云云。嗚呼。食人之祿。揚人之

醜。朝中有進借用客卿之議者。願三思之。

記者曰。以上所陳。不過就中國入賽情形言之。此次不特虛糜鉅款。又使我四萬萬人之

奇辱。永永印入全球人士之腦中。嗟彼洋員。章吾國恥言之痛心。雖然。往者不可諫。來者

猶可追。幸吾國人同鑒於此。而勿以一歎置之。

外務部商部會奏議覆雲貴總督請在雲南省城開設商埠摺

光緒三十一年三月十六日准軍機處鈔交雲貴總督丁振鐸奏雲南省城商務日漸繁盛

擬請開設商埠以擴利權一摺本日奉 硃批該衙門議奏欽此欽遵到部查原奏稱近年各省內地如有形勢扼要商賈薈萃之區迭經內外臣工奏請開埠通商如直隸之秦王島福建之三都澳湖南之岳州山東之濟南等處均奉 旨允准歷經遵辦在案雲南地處極邊外來商賈本屬無多比年以來蒙自思茅騰越先後開關中外通商貿易漸臻繁盛滇越鐵路轉瞬暢行省會要區商貨尤爲輻輳自不得不開商埠以保主權茲據雲南紳士翰林院編修陳榮昌等稟稱省城南門外得勝橋地方爲官商往來孔道貨物駢集市廛櫛比且與車站附近應請援山東湖南等省成案就該處開作商埠實於交涉商務利權均有裨益等情前來查所稟係屬實情今昔形勢既有不同亟應援案請將雲南省城開設商埠以便通商而擴利源等語臣等竊維開埠通商固屬中外交獲其益尤貴由我自握其權從前沿海沿江各處俱係約開口岸其租界內工巡等事多由外人辦理迨光緒二十四年總理各國事務衙門奏准在直隸之秦王福建之三都澳湖南之岳州添開通商口岸實爲自開商埠之始上年北洋大臣袁世凱等因膠州鐵路已通至濟南省城奏請在濟南城外商埠亦經外務部議覆奉 旨允准在案雲南雖地居邊遠向來商務無多惟現在滇越鐵路轉瞬即通從此門戶洞開形勢正與濟南相同自應先事籌畫以期振興商務而保主權今

雲貴總督援案奏請在雲南省城外開設商埠係爲因時制宜自擴利權起見擬請准照所請辦理如蒙 俞允應由該督查照各處自開口岸辦法預備一切事宜俟議妥章程卽行奏明定期開辦再由外務部照會各國駐京使臣查照並劄飭總稅務司遵照辦理謹 奏 奉 旨依議欽此

商部奏整頓商務請 旨通飭各省清理詞訟嚴禁需索摺

竊商業以信義爲體以母財爲用現今市面日緊各省人心風俗日益澆漓奸商倒欠之案愈出愈奇地方官輒視爲錢債細故不爲清理信義不孚銀根愈緊商業所由不振也臣部綜司商政若不實行保護之政卽提倡亦徒託空言自非首先釐清商人詞訟不足以除積弊而戒因循伏查光緒二十九年八月初六日欽奉 上諭現在振興商務全在官商聯絡一氣以信相孚內外合力維持廣爲董勸以期日有起色等因欽此又是年九月初一日臣部奏請通飭力行保商之政一摺奉 上諭中國自互市以來商務日盛現在設立商部正宜極力整頓相與維持惟中國商民平日與官場隔閡情誼未能遽孚而不肖官吏或且牽掣抑勒遇有詞訟不能速爲斷結辦理不得其平以致商情不通諸多阻滯著各直省將軍督撫通飭所屬文武各官及局卡委員一律認真恤商持平辦理力除留難延擱各項積弊